

# Sukupuolineutraalit avioliitot ja vihkiminen

FAKTAPLAAVI

Jyväskylän yliopisto

Ju 09.01me · Oktuuperi-/lokakuu 2010

1 pv. mai-/toukokuuta 2009 lähtien jälläavat uuet säänöt jotka koskevat avioliittoja ja vihkimisiä. Henkilön sukupuoli ei enää ole merkitystä ko oon kyse maholisuuesta solmia avioliitto. Avioliittokaari (-balk) ja muut säänöt jotka koskevat avioparia oon tehty sukupuolineutraaliksi ja laki (1994:1117) rekisteröitystä partnerisuhteesta oon poistettu. Tässä lyhy esitys uusista lakipykälistä.

## Muutoksia avioliittokaaressa

Kaks sammaa sukupuolta olevaa henkilöä saattaa mennä avioliittoon samoila ehoila ko parit jotka oon eri sukupuolta. Määräyksiä avioliittokaaressa käytetään samala mallin riippumatta siitä onko pariskunnat eri eli sammaa sukupuolta.

### Esteselvitys (Hindersprövning)

Ennenkö avioliiton saattaa solmia, häätyy selvittää onko olemassa mithään esteitä avioliitole. Selvityksen tekkee Verolaitos. Net kaks henkilöä jotka aikovat solmia avioliiton, hakevat yhdessä esteselvityksen Verolaitokselta.

Esteselvitys joka oon tehty partnerisuhelain mukhaan ennen 1 pv mai-/toukokuuta 2009 jällaa siitä lähtien esteselvityksenä vihkimiselle.

## Maholisuus rekisteröijä partnerisuhe oon poistettu, mutta käsite oon jäljelä

Laki partnerisuhteista oon heittäny jälläamasta aprilli-/huhtikuun lopussa 2009. Se tarkoittaa ette enää ei ole maholisuutta rekisteröijä uutta partnerisuhetta. Partnerisuhe joka jo ennen oon rekisteröity, jatkuu semmosenna siihen saakka ko se purethaan eli muutethaan avioliitoksi (lue tässä alhaala maholisuuesta mitenkä rekisteröity partnerisuhe jällaa avioliittona).

## Rekisteröityn partnerisuhteen muuttaminen avioliitoksi

Partnerisuhe joka oon rekisteröity partnerisuhe-lain mukhaan, jällaa avioliittona jos partnerit yhtheisesti ilmottavat Verolaitokselle ette het niin halvaavat. Partnerisuhe jällaa avioliittona siitä päivästä lähtien ko semmonen ilmotus oon tullu Verolaitokselle. Pariskunta saattaa kans valita ette ilmotuksen eestä käy vihilä avioliittokaaren (-balk) 4 kap. mukhaan. Vihkiminen joka tapahtuu tällä mallin, ei vaai esteselvitystä. Partnerisuhe jällaa avioliittona vihkimisajankohasta lähtien.

Maholisuus muutoksheen ei ole aika-rajotettu.

## Vihkiminen

Avioliitto solmithaan joko siviilivihkimisen kautta eli vihkiminen tapahtuu jonku uskontokunnan (-samfund) sisälä.

### Siviilivihkiminen

Siviilivihkimisen toimittaa se jonka lääninhallitus oon määräny tehtävään. Määräys olla vihkimisen toimittaja pittää jällata tietyn ajan, jos sitä ei ole rajotettu jälläahmaan vain tietynä päivänä. Lääninhallituksen päätöksestä ette jotaki henkilöä ei ole määrätty vihkimisen toimittajaksi, ei saata valittaa.

Käräjäoikeuen lainoppinheele tuomarille ei enää kuulu vihkimisen toimittaminen.

Siviilivihkimisessä vihkimisen toimittajan pääasialisesti pittää puhua seuraavat sanat pariskunnale:  
*Tet oletta ilmottanheet ette halvaatta mennä avioliittoon keskenhään. Halvaatko sie N.N. ottaa tämän N.N:n sinun vaimoksi/mieheksi?*

*(Vastaus: Halvaan.)*

*Halvaatko sie N.N. ottaa tämän N.N:n sinun vaimoksi/mieheksi?*

*(Vastaus: Halvaan.)*

*Mie julistan teät nyt aviopuolisoiksi.*

Jos pariskunta erityisesti sitä pyytää, vihkimisen toimittaja saattaa sen eestä sanoa seuraavat sanat heile: *Tet halvaatta sitoa avioliiton keskenhään. Avioliitto rakentuu rakhauen ja luottamuksen pohjale. Solmimala avioliiton tet luppaaatta kunnioittaa ja tukea toinen toisthaan. Aviopuolisoina tet oletta ittenhäisiä indiviitiä ja saatatta hakea voimaa yhteenkuuluvuudesta. Ko tet oletta ilmottanheet ette halvaatta solmia avioliiton keskenhään, mie kysyn: Halvaatko sie N.N. ottaa tämän N.N:n sinun vaimoksi/mieheksi ja rakastaa häntä myötä- ja vastoinkäymisissä?*

*(Vastaus: Halvaan.)*

*Halvaatko sie N.N. ottaa tämän N.N:n sinun vaimoksi/mieheksi ja rakastaa häntä myötä- ja vastoinkäymisissä?*

*(Vastaus: Halvaan.)*

*(Pariskunta saattaa vaihettaa sormuksia.)*

*Mie julistan teät nyt aviopuolisiksi. Ko tet nyt jatkatta elämää ja menettä takasi arkheen, niin pitäkää mieles- sä sitä halua kuulua yhteen, sitä keskenhäistä rakhaut- ta ja kunnioitusta jota tunsitta tällä hetkelä ja joka oon ohjanu teät tänne. (Tekstin oon kirjottannu Per Anders Fogelström.)*

*Antakaa minun toivottaa teile onnea ja menestystä teän avioliitossa.*

### **Uskontokunnassa vihkiminen**

Vihkimisen saapi vain toimittaa semmonen uskonto- kunta jolla oon vihkimislupa ja semmonen pappi eli muu toimihenkilö uskontokunnassa jonka Kamari- koleegio oon määränny vihkimisen toimittajaksi. 1 pv. mai-/toukokuuta 2009 lähtien vihkimislupa- vaatimus jällaa kans Ruottin kirkkoa. Samala laila ko muissaki uskontokunnissa, jokhainen vihkimisen toimittaja Ruottin kirkossaki häätyy saa siitä erityi- sen määräyksen Kamarikoleegiolta. Papile Ruottin kirkossa ja jolla oli lailinen oikeus toimittaa vihki- misiä aprilli-/huhtikuun lopussa 2009, jääpi tämä

oikeus aprilli-/huhtikuun lophuun 2010. Henkilöilä jokka vihithään papiksi vuen sisälä siitä ko säänöt alkavat jällaaahmaan, oon kans oikeus toimittaa vihkimisiä aprilli-/huhtikuun lophuun 2010 ilman erityistä määräystä.

Vihkiminen tapahtuu sen vihkimisjärjestyksen mukhaan joka uskontokunnassa jällaa.

Uskontokunnala ei ole olemassa velvolisuutta toimittaa vihkimistä, eikä ole silläkhään jolla oon oikeus toimittaa vihkiminen uskontokunnassa. Se tarkottaa ette saattaa sattua ette joku pariskunta joka halvaa vihkimisen tietyssä uskontokunnassa, ei saa sitä sielä toimitettua vaikka pariskunta täyttäs avio- liittokaaren vaatimukset. Se saattaa olla esimerkiksi tilane jossa uskontokunnan eli vihkimisen toimitta- jan uskonkäsitys estää vihkimisen sillä ette osapuoli- la ei ole sama uskonto eli ette toinen osapuolista oon eronu.

### **Enämpi tietoa**

Lue enämpi uusitten määräyksitten taustasta hal- lituksen propositiojuunissa Avioliittokysymyksiä (Äktenskapsfrågor) 2008/09:80 hallituksen webb- paikala: [www.regeringen.se](http://www.regeringen.se) ja Siviilivaliokunnan (-utskott) mietinöstä (betänkande) 2008/09:CU19 valtiopäivitten webbpaikala: [www.riksdagen.se](http://www.riksdagen.se).

Lue enämpi avioliitosta ja vihkimisestä hallituk- sen webbpaikala [www.regeringen.se/aktenskap](http://www.regeringen.se/aktenskap).

Lue enämpi siviilivihkimisen toimittajista läänin- hallituksen webbpaikala: [www.lansstyrelsen.se](http://www.lansstyrelsen.se).

Lue enämpi esteselvityksestä, ilmottamisesta muuttaa partnerisuhteen ja vihkimisestä ulkomaila Verolaitoksen webbpaikala: [www.skatteverket.se](http://www.skatteverket.se).

Tietoa maholisuuesta mennä naimishiin jossaki uskontokunnassa, katto esim. [www.svenskakyrkan.se](http://www.svenskakyrkan.se).



REGERINGSKANSLIET

### **Justitiedepartementet**

10333 Stockholm • tfn växel 08-405 10 00

Useampia kappalheita faktoplaavista saattaa tilata Jyistiisiedepartementistä, tel 08-405 10 00 eli e-posti: [info.order@justice.ministry.se](mailto:info.order@justice.ministry.se)

Hallituksen webbpaikka: [www.regeringen.se](http://www.regeringen.se)

Jyistiisiedepartementin e-postiosote: [registrator@justice.ministry.se](mailto:registrator@justice.ministry.se)

Painanu Grafisk Service, oktuuperi-/lokakuu 2010.

Faktoplaavin oon tuottanu Jyistiisiedepartementti. Artikelnro. Ju 09.01